



10002

寓林集卷之十五

誌銘

鄉進士董君暨配徐碩人墓誌銘

萬曆己未冬予以藩臣畢呼 嵩之役便道歸家又

哭余長子悲纏羸博謝一切應酬文字不復作而友

人比部許君以外兄董君暨其配徐碩人狀來請銘

孝廉余同舉士也孤纒緒奉狀乞之哀狀纍纍數百

言所敘生死其苦之誼又恹而愴余安忍辭按狀君

小集

卷之一五

一

諱明吉別號念齋夢徵其字世爲杭海寧人滕國以

前不具論自鎮徙錢山曰治者逮封侍御賓溪公翼

凡八世而侍御史愚齋公學爲君之祖茂才醇字公

儒君父也侍御公夢山陰諸脩撰南明至已而誕君

故以明吉名而字夢徵君生而娟好眉目如漆聰穎

善解人意家人輩奇之相與號曰聰官七齡就外傳

十三歲爲文有異致又二年采芹于泮弱冠有廩食

聲籍諸生間又九年辛卯舉於鄉君故穎而能沈詣

好湛深之思一時同年甚見推舉謂可芥拾一第而

武林黃汝亨其父著



數奇三上公車輒報罷茂才公性儉而嚴所給君膏  
火費不甚具而君才美意高廣多交游雅好施與周  
親之貧乏者而身實苦貧欲乞爲學官食苜蓿朝夕  
格于序不得而持名檢甚厲所佩印章自稱清白吏  
子孫不肯俯仰人取一錢自潤以故愈窘所需悉稱  
貸期盡不欲負約復貸以償貸累益重籍而記之曰  
窮鬼簿而不忍告于其父每披籍佗佗輒呼酒自遣  
以故病渴不解戊戌罷公車歸益慊已亥遂賞志以  
歿歿之日茂才公始見所籍簿夫悲慟曰兒至是耶  
于是乎父茂才公母徐孺人兩老人與所遺十歲孤  
舉委之君配徐碩人一身矣碩人亦宋以來名族也  
父孝廉門山石公某母郭氏爲汾源叅知公女十一  
歲母郭見背能遵姆氏訓年十六歸于董事舅姑性  
殊致孺人敬戒有婦道善調劑其間甚適性不好飾  
日坐捆內衣素茹淡帥婢子女紅以佐夫子膏貲自  
爲諸生及薦賢能之書如一日也自董君歿欲從死  
而以兩老人與孤在強而生又十七年舅氏茂才公  
歿明年姑徐孺人亦歿孺人一孀婦率其孤襄大事

橐無長物淚枯血竭又一年而身亦隨之嗚呼碩人之節孝哀苦可亾憾于夫君而夢徵可無憾于九原矣董君生嘉靖丙寅閏十月廿三日卒萬曆己亥八月廿八日得年三十有四碩人生隆慶庚午十一月廿七日卒萬曆戊午六月初六日得年四十有九嗟乎以董君之才能發憤上公車一第何有而卒草不遇之文砥行以死然非碩人能爲君婦成其志此髫鬣者亦安可冀其讀父書表見于文學而兩老人亦何以善其生死其亦賢也已子一卽續緒邑庠生所

馮恭集

卷之十五

三

稱十歲孤者也女一字憲副陳與相虛舟公季子邑庠生祖芬祖芬天續緒將以是年某月日塋其父母于某山之原

高士邵虎庵先生塔銘

先生邵姓名穆生一名重生別號虎庵比部員外郎弘齋公諱經邦仲子也比部有直節疏劾首相張文忠公戍閩所著有弘簡弘道弘異三集行世是生先生先生生而負奇骨相磊落音吐弘亮爲諸生獨立不屑爲科舉比偶之學年三十餘卽屏居靈鷲山之

呼猿洞手自開鑿巖岫營構軒閣樹藝花木多佳絕  
所貯自經史外多古文奇字玄筌秘笈之書晨昏披  
覽凡四十餘年不入城市花朝月夕出游湖上間一  
歸視卽返性嫉仇俗子俗子亦詫遠之冠蓋車騎客  
過之若免郡守喻公邦相迫欲見卽踰墻遜去至毀  
薪拆屋不與一接吾鄉有尚書公偶得披帷入有問  
聊且荅數語卽揮手不應其孤峭如此惟是道人衲  
子樵夫野老琅琅與之談或方外韵士酒徒詩客有  
扣斯應仰天浮白竟日長嘯與猿狖響荅不勸也俗  
事不屑聞見逢忠孝大節及人間不平事則慷慨起  
若挺身欲赴者精皇極數多驗不欲泄于人所游名  
山卽自爲圖畫畫多古法間出王叔和米元章筆偶  
一應客不多作詩稱唐而不模擬唐句往往自快胸  
懷類李長吉寒山詩然亦無意也凡先生所尚不但  
不襲人唾遺亦不逐人情好予讀書靈鷲山與先生  
往還歷歷紀所見多類此其潛脩默證超然獨詣不  
可得而見其絕慾趺坐不倒身抱足夜如其晝者則  
自癸巳四月對天設誓辭仍勒石記之曰某年月日

某人試天劍于此則二十五年一日也丁巳三月忽  
倒身臥胸突生一骨痛不可忍先生卽猛然省跌坐  
如昨而痛骨立消于是命速治愈毋用木命踰月而  
葬于山廬之側冢上置塔塔覆以亭毋它易歿之前  
二日撤食豪飲水數斗遷居樓下危坐靜存端寂而  
逝蓋丁巳四月二十七日未時也歿時禁念佛曰非  
吾師吾師伏羲文王孔子也目將瞑一僧欲焚香稱  
接引大聲喝曰吾與爾教不同是時頂門熱如火發  
四體柔和又三日而掩龕顏色如生焉先生骨力堅  
毅學道深入蓋其驗云予嘗言先生似嚴冷而腸熱  
似猛厲而意坦似倨野而致文此流俗人不見也先  
生不妄交游所交惟雲棲大師虞長孺銓部馮開之  
司成吳伯霖孝廉與予輩數人而已所著有武林山  
七誌山中甲子詩文數種有獨見多傷時藏之山中  
年八十有一其長子文學于巖孫泰來諸生從予遊  
奉先生命屬予爲記而銘之予負諾青年餘矣乃得  
記其畧而系之銘

銘曰元氣氤氳馮生庶民靈鷲之靈乃鍾斯人奇姿

異骨宏域超倫汎濫羣書苞孕天真承義文師作巢  
許隣百家二氏或友或臣蟬蛻塵埃四十餘春高臥  
青山逍遙玄津巋然一堦身隱道伸我銘爾式千載  
若新

亾兒茂梧擴誌

嗟兒茂梧亾矣有志年無奇文瑰行足以託名筆  
而念其賁志以歿不忍令後之人無聞于是乎披淚  
以志茂梧余長子元配贈孺人沈氏出也生十月而  
母沈見背余抱而啼須臾媪乳活繼乃得專乳越歲

寓林集

卷之十五

六

余繼配孺人張氏母依焉六歲而張又見背九歲余  
繼配孺人吳氏撫之兒眉目踈秀受書能讀而氣孱  
弱不任讀戊戌余舉進士次年授江西進賢令攜之  
官受易自是余兩入計往來進賢凡六年兒俱從令  
受師訓讀經史左馬秦漢人文俱成誦稍稍能爲文  
未成服不遽令赴童子試余以乙巳行取入京師而  
兒畱家食丙午十九歲乃赴試爲督學李二溟公見  
收補錢唐博士弟子員是年娶婦顧氏家居從師友  
下帷戊申復就子京師是時兒頗銳意向上下筆屹

屹幕先民法未合詞多濫以是初赴督學陳公考失利  
亾何予亦絀而歸西湖三年集二三子講道談稅  
兒俱從獲與諸雋士奮筆角文戰事揣摩督學慕芻  
王公兩試俱高等壬子入試列副榜不卽售命也時  
予官南工部轉儀部兒俱讀書家山苦心揣摩及故  
所習經史左馬秦漢人文手再錄一過書自警語徹  
旦不寐期副予望遂嘔血病矣巳爲督學斗垣周公  
所賞識置高等補增廣生丁巳予轉官督學江西兒  
不能從時時病心胃不解戊午余遺書戒勿就科舉

試而兒乃扶病強入試督學虛臺蔡公置高等然僅  
喘喘望棘院太息不得入病彌甚矣名心未斷乃檢  
生平所爲文百餘篇取所被鑒賞者將付剞劂而上  
書乞題一語且曰兒至此非能爭雄稅林第以十五  
年研苦此道存吾父箕裘之遺以示後人不令嗤兒  
枯木朽株足矣予憐而許之亾何巳未春二月十五  
日卽長逝痛哉大都兒少失母怙氣竟孱弱不副志  
負姿亦穎秀不至下劣又時從予得侍賢師高朋之  
側入耳無猥瑣語爲文恥流俗而心手未卽應年來

稍成文采而以病奪。竟伊鬱牀第間。悲夫。兒虛願多智。凡書法詞賦。病中涉畧。亦時露佳處。不竟。性嗇。每事依于寒儉。不作華靡習氣。自甲寅至今。強半病心。血日與醫師藥餌爲伍。中乃屏醫藥不御。學導引法。亾效。嘗從雲棲師聞佛氏西方之業。乃併導引不事。皈命于佛。手書金剛心經二冊。及雲棲所選白香山警悟篇。置案頭披覽。以是卽病劇無怖畏愁苦狀。沒之前一日。呼予竟日。囑婦顧曰。生歿夢幻。余無它苦。惟不得報親恩。有未了念。善教二幼孤。補吾過也。語。

訖右脇安祥而逝。距生之日爲戊子閏六月二十八日。得年三十二。悲夫。兒無子淵之哲。而同蚤夭之年。志業未就。文藻膚立。而乃以未了之願。望于不可知之孫。使余白頭纏悲。痛哉。幸二稚孫稍稍見頭角。婦慧哲曉文理。能爲母。可督教成之。兒所幸不亾者是耳。婦顧氏爲上林苑署丞友白顧公女。雲南觀察悅庵公孫女。舉子二曰燦曰琰。女二俱幼。未字。將以是月。厝兒柩祖塋。志以俟卜地而藏之日。納諸壙中。余先世越人。自洪武初占仁和匠氏籍。代有隱德。詳先

贈公霍洲先生誌表不具述

亾女媿仲子婦壙志銘

媿仲子者太僕養谷公之仲子士純也。吾女歸仲子七年而夭。仲子不忍亾吾女。泣而手爲狀。請吾志。嗟痛乎。吾忍亾吾女乎哉。凡吾先後所舉男女九人。而女次爲七。繼室封孺人吳生。生而淑。是名爾淑。吾與太僕並爲諸生時相善。辛卯並舉于鄉。文章氣誼益相得甚歡。迨太僕以壬辰登第入庶常。改兵垣。而戊戌生仲子。是吾登第之年。吾官江西鍾陵令。三年生。寓林集

卷之十五

子折箸。仲子憂不給。女曰：無憂貧也。余亦貧。家女荆布之餘，可稍稍佐君。君第力學讀父書而已。仲子願稍解，女未嘗授書，能曉其理。坐一室爲仲子澣衣炊米，暇卽焚香啜茗，以爲適。瀟如也。然終以質弱善病。吾自南儀曹視江右學政，不獲時視女。己未夏，吾亦病，以叅議賫捧歸視女。而女病痰滯，喀喀跂枕上，連晝夜不得臥，骨如柴立。吾揮淚別去。迨歸而幸，以恙以爲女生矣。不謂病尚在脾膈間。庚申春二月，太僕忽病，咽食不起。女哭于帷甚傷。吾往哭，則牽吾衣。

寓林集

卷之十五

十

號不已。以是體愈羸，強以藥扶之。而姑高孺人故善病，亦以哭。僕加劇。辛酉夏五月，復不起。是時女政病臥牀，聞之撫牀大慟，慟無聲。竟從姑逝矣。嗟乎痛哉！臨逝無怛，呼仲子，呼母，呼其子志雲至，則不能言。目盼意授之耳痛哉。女天性依於孝謹，又儉讓，卽吾家所貽衣笥，奩具幾何。啓視之，尚有一二未御者。遇臧獲輩，亦無咄咤聲。於法宜壽，令與仲子偕老。卽鮑婦龐耦可企，而以夭折何哉。女生於萬曆辛丑十二月十七日，塲於天啓元年辛酉六月初七日，得年二

十一母吳氏誥封孺人處士吳傳巖公女吏部尚書  
默泉文襄公曾孫女仲子名士純國子生子一卽志  
雲甫六歲未聘仲子將以某月日從太僕公高孺人  
靈輻厝于葛嶺之宮且卜地藏焉予枚泱志之而系  
以銘

銘曰汝何依兮素風汝何歸兮白雲玉則折兮餘輝  
蘭則摧兮遺芬身偶盡兮無年子或長兮有聞墳三  
尺兮爾琬識千秋兮吾文

金虞仲墓誌銘

寓林集

卷之十五

十一

萬曆辛亥九月文學金君葵其父近川公黃柏之原  
予實爲銘章明年君卒又明年九月克葬于瑤山之  
陽長子以寧余門人也來乞銘嗚呼予以二年間銘  
君父子君又僅逾下壽以歿可哀已君諱汝臯字虞  
仲別號見華姓金氏漢車騎將軍秬侯之裔宋建康  
中避亂南徙故爲休寧人考諱璿葬黃柏者也君才  
識過人喜議論往往奇中然不炫耀取世譽閭然內  
脩衣冠朴古有先民之風孝友其天性也君兄第四  
人先是季客歿錢塘君哭之慟已而伯歿戊戌之冬

叔又歿錢塘。母黃孺人又歿十餘年而父又歿。君至性過人。而天故困苦之。至連哭其兄弟父母。以是不能長。永年歲。悲夫。君年十五。賈池陽而歸。慨然曰。人生會須讀書。知古今。識道理。時來則拾取富貴。展所欲爲。爲吾親光榮。奈何。挫志作賈人子。因發故所讀書讀之。曰。必如是。未幾。選爲諸生。聲譽凌其老宿。俯視青紫。猶掇之也。試京兆者再。竟不獲雋。而賣志以歿。悲夫。君好讀毛氏詩。左氏傳。亦喜莊生寓言。所著有支頤集。晚乃學佛。爲居士。嗚呼。豈有感于天倫之

痛而將以悟。夫歿生去來者之爲浮漚聚沫耶。抑重感此生而種。所謂來世者之因也。君又慷慨好施。家不甚富。而往往周人之急。與人交。堅于金石。與吾友吳仲虛善。仲虛父子亦莊事之。嗚呼。觀君父子兄弟朋友之倫。其他大畧可概見矣。方叔歿錢塘。君畱家侍孺人疾。不知也。其姊知之。恐其倉卒驚駭。不卽以聞。而微見顏色。君察知其意。忽投幘號曰。吾弟歿矣。無恠。吾數日食不甘。寢不寐。仆地號不止。良久。兩手據地曰。母病甚。在牀。何可使老母哭。壯子因強爲好。

左 敬 皇

氣友 鄉社 道

顏趨侍。白第病。宜遣男以寧赴錢塘視疾。實經紀其喪。君悲痛慘毒而衣冠如故。常中夜帷中涕泗而已。其孝友兼至類如此。君配胡孺。人生二子。長以寧。從予遊。補諸生。錢塘次以謚。歿十有四日。而張氏妾又生一子。今名以忠。君二弟俱夭。無子。故哭之尤悲。君既命以謚。為季後而叔。又得君遺腹子。以不餒。君可瞑目也。已予讀以寧所為述。悲其哀痛。又嘗辱君知。不敢辭。遂書其大節。而君之家譜世德。與夫姻戚孫子。既已畧見于前銘矣。不復詳。其它才藝。非關君大節者。亦不書。

卷之十五

銘曰。績學不試。非所恥。兄弟四人。三天歿。君之傷生。蓋以此。嗚呼。惟孝與友。垂野史。

凌母張孺人墓誌銘

吾友凌元禮。諱登嘉。以名家子。束脩好學。高才湛思。名聲藉甚。諸生間與予同師。受易敦研席之好。萬曆戊戌元禮亡。予哭之嗚咽。為立傳。記其一二大者。又十有三年。而其配張孺人歿。又三年克葬。其子嗣熙。嗣慈。以其世父太守公元孚狀來乞銘。曰。吾父捐館。

時吾兄第三人俱幼小。又同時善病。吾兄歿而不肖。兄弟尪羸甚。吾母百計醫藥不效。卒購得異術以生。以無墜先人緒業。吾母持門戶。內外斬斬。宗親族黨。幾忘其孤寡焉。吾母夙通文義。每不肖孤讀書。輒能。搗指得失。然則墓中之石。非先生銘。母氏晦不傳。且。何以慰吾父地下。予悲其意。因思元禮讀易山中時。如昨日耳。迨其亾。十有六年。于此矣。嗚呼。十有六年。之間。生。生。歿。歿。男子不及辨。而一寡婦拮据閨闈之間。裏吾。是以賢孺人而樂爲之銘也。方長男之殤歿者。

急飯含。疾者仗湯藥。醫師匠氏雜然于堂。內外姻族。下及臧獲。罔不遑擾。失措。孺人灑泣營辦。兩不廢亂。而二子病日深。卽賴異術起。然猶奄奄牀簀者數歲。孺人如一日也。又能以其隙治生產。舒無嗇有。二子病良已。亦必自勞瘁。曰。吾勞吾身而貸吾兒。令體任誦讀。昌大吾家快矣。或時篝火夜讀。聞詩書語。便自尋繹。或令訓解。至關節義嚴禮法者。必令再三吟而。間爲品論。多合道理。孺人孩年失恃。縫紉盥饋。未嘗學諸母。童年作婦。燕享賓祭。不以煩其夫。其天資端。

敏有過人者。大都靜嘿爲體，精勤爲用。而本原孝慈，諸閨闈之秀，斤斤無成者。方之茂如也。孺人錢塘名族，太學泉山公樞之女。大中丞澤山先生之孫，母楊氏爲女十四年而嫁。爲婦二十二年而寡。爲母十三年而卒。子男三人，長嗣憲蚤夭。其二熙與慈也。女一人適陳肇。孺人生長貴富，少無香薰之好，中更霜雪之慘，終堅松柏之操。方欲含飴弄孫，安享子婦滄澗之奉，而竟不得下壽。以歿，天生孺人若僅以完我元禮未了之局者，可哀也已。可哀也已。萬曆四十有一年某月某日葬其鄉某原，合于元禮之藏。而司空郎黃汝亨爲之銘。

銘曰：夫子制義，婦一以從。孺人實才，而代其終。匪母何怙，諸孤待哺。孺人稱寡，而兼厥父。孱孱者立，蹇蹇者亾。死而不亾，惟賢且良。耦德而藏，千秋孔揚。

徐母張孺人墓誌銘

孺人姓張氏，長洲人。盡脩公諱某之女，太醫文橋徐公諱某之婦。文學振寰，公諱某之繼室。生十七年而歸，歸二十有一年而孀。孀二十有四年而卒。卒之時

孫曾環而哭者十一人而孺人實未嘗舉子子太學君本仁元配王孺人乳也本仁乳而王孺人暴卒太醫夫婦悼之甚本仁呱呱泣太醫公亦泣曰不得賢母脈燥濕亾婦將不瞑求之期年而得孺人孺人生而端敏工組紉精饜饅不苟笑語慈愛其天性也所以爲人母之道不學而至當是時太醫公夫婦始識弄孫之樂亟稱新婦賢孺人孝事惟謹佐以勤儉每織達丙夜而文學公亦呶唔不絕以答其意家人稱好學焉時季父少宰公某以館職奉使還聞而立詆

之大喜挈以遊京師學禮趙太史之門三年而盡其說乃歸文學公無色養之憂者知孺人足賴也文學公旣脩身茂學久困諸生間不得志勞瘁中暑病幾絕孺人迫無策羹臂肉以進俄而甦張目謝孺人曰帝鑒汝幸益我一齡明年六月果卒孺人欲殉者數矣是時太醫公尚無恙泣戒孺人曰獨不念舅老無可仗遺孤未立乎孺人悟疆起治事然晝夜哭淚爲之枯家人莫忍仰視已而本仁病窮醫禱不愈孺人噉然號蹶然起匍匐雨淖中哭于關帝君之廟霍然

已於是戒本仁勿務進取壹以課孫爲職有孫某登  
類宮者孺人喜稍可願養延天年而二十餘年已來  
歷哭舅姑之喪困于役家益落拮据益苦神耗而疾  
作矣孺人自知不可起戒迎醫誦佛號安寢待盡泊  
然無悲時萬曆四十三年九月二十四日也嗚呼孺  
人之爲母爲婦可不謂劬勞者哉先是姑朱孺人病  
孺人每夜焚香告天願以身代卒不起繼朱者側室  
王氏生子某今爲少宰後王又蚤歿亦仗孺人慈而  
立者也方太醫公大漸時本仁適科試南都而少宰

寓林集

卷之十五

十七

又卜居陽羨宗人信信孺人多遣急足迎少宰少宰  
至而內外人無一敢起爲難於是集宗人堂下悉取  
其質約雜燒之更稟給焉而別遣呼本仁亟歸母畢  
場屋其見義鎮靜類此孺人雖婦人而通書大義嘗  
聽諸孫讀史薄項伯而忠亞父故其遇事有本末不  
舛嗚呼使文學公不得孺人以爲之配則此呱呱泣  
者將不免于水火又安望其誦讀成諸生而子孫蕃  
衍碩大如今日也哉孫男四某孫女四適某  
適某字某字某嫁娶皆名族曾孫男一曾孫女二皆

幼卒之踰月本仁將啓文學公之藏而合窆焉乃得水驚既葬之穴皆水於是卜茶磨山祖塋之旁食遂以今年某月某日奉遷太醫公文學公及祖母前母之匱而孺人始克祔予與本仁親有連知孺人爲詳故因其請而許之銘

銘曰前人布穀我耘耔昔始萌芽今蕤蕤既穫而炊餼餼簋所食幾何捐棘七天生令母篤徐祉刻此銘詩示千祀

太學吳元益配孫孺人墓誌銘

寓林集

卷之十五

十八

萬曆己未夏四月太學吳君元益之配孫孺人卒元益悼之哀曰天乎何以亾吾婦其子昌國等躡而號曰天乎何以亾吾母今年庚申葬有日矣則父子又相向泣曰何以不亾吾婦與母于是令其子昌國爲狀而介其弟中翰君德聚來乞銘予與元益通家誼最深不能辭按狀孺人出休之草市名族父溪亭公某母程孺人甫七歲而母程見背暱就長嫂如母父甚驕憐之不輕字人及笄而歸于吳孺人孝婉慈慧嫻女職恭婦道其天性也事舅省吾公姑程孺人昕

夕伺眠起、食飲惟恪、未嘗以爲勞。姑病與元益襲服、而侍湯藥、虔禱祠、無所不至。姑病良已、未幾省吾公、客吳越、以病還。孺人亦如其視姑病時、而省吾公竟不起。孺人哀痛從內、襄事如禮、且謂姑寡居、益媚事之、而程孺人遂得忘其老寡、優游以介、詹壽會元益遊武林、亦病還里。時值炎暑、孺人終日夜旁皇、攝持不知蚊蝨之嚙噬者、閱四十餘日、而元益乃霍然舉手屬諸子曰、而母實生我、孺人故精飮事、叵問事舅姑、必自調燮、歲時祭饗、致其潔芬、至元益喜賓客、四

寓林

卷之十五

十九

座常滿、菽脯餽核、不飭而具、其餉遺戚黨、致悃款、豐約必中禮、與姊姝處、和而肅、而事姝尤謹、恒語元益曰、兄第六人、二已蚤世、君爲家督、毋墜翁家風、貽母氏憂、可令二姝失所耶、課諸子寬嚴之間、惟是從、與元益延名師、勝友相薰習、以底于成、遇廝養輩、無譏呵聲、而有制、凡購物于市、必誠曰、販夫販婦、可念、寧賚徵、母剋、而與爭利、性尤喜儉樸、至施予、收恤、當厄振窮、獨未嘗有倦色、先是孺人從元益武林、病幾殆、夢一白衣人來撫摩、呼善女人、蓋大士佑之也、病以

是去體三年歸商山疾復作遂不起屬續之久惟以  
不克終事程孺人爲恨寬元益以聚散無常毋過傷  
悼名諸子婦人人慰語無恐怖迷惑態安詳而逝得  
年四十有五嗚呼若孺人者於元益爲令妻於其尊  
人爲孝婦于諸子宗黨爲慈母可謂備德也已雖享  
不酬德年遜下壽命也且世筭黛者流榮華珈佩者  
纍纍亦不乏老婦人皓首食息而不能保無俗疵以  
視孺人之德之備其顯晦壽夭何如哉而孺人且多  
男子必有昂肩天衢以光泉壤者其不朽又有在矣

寓林

卷之十五

二十

孺人生萬曆乙亥五月初九日卒以己未四月二十  
有八日明年四月十有四日葬箕山之陽丈夫子四  
昌國昌胤昌倫昌意女二壻某某銘曰

鬱葱宵邃箕山陽有善女人于焉藏蘭芬玉學德孔  
良子孫保此世且昌陵遷谷變慶未央

太倉州倅衡洲張公暨元配李孺人合葬墓誌

銘

衡洲張公以太倉州倅賦遂初歸三十餘年而以老  
壽捐館舍其長子懋官余婿也次子若采亦予門人

相率伏地泣曰先君有言我必踰月葬母後則孤等  
忍痛用命其曰我無高行足術勿以誌銘潤鉅公筆  
則孤等痛不忍夫先君生平所潛耀砥行生平所知  
也而泯泯腐草木孤等何以爲人且先母氏李之能  
匹偶先君也而未有誌也敢以累子予亦泣相視不  
能辭受而誌之按狀公諱湘字子南別號衡洲世仁  
和人也其先爲文質公彬彬生怡然公獻介然公珍  
珍生誠齋公綬以孫吏部尚書恭懿公瀚資贈兵部  
左侍郎誠齋公生四子伯夔山公應祐以子中丞某

寓林

卷之十五

二十一

覺封吏部

郎仲亭山公應祿恭懿父也封工部

尚書叔與山公應裕順天府醫學正科是生公公生  
而慧丰儀楚楚清瑩如玉未冠補博士弟子員當張  
氏全盛時朱輪華轂照映閭巷而公性行恬介無文  
袴自喜之氣日下帷手一編尤喜讀漢晉書間習詩

以唐爲宗所嘯侶如青門沈山人望雲趙溧陽公俱  
名流冢宰公亦蚤器重之已游國學益研心經術有  
聲而與山公得公晚憐公體羸不願以身易名遂迫  
就部試試卽冠儕偶當佐郡已授太倉州倅非其好

也人或疑公賈介子第未必能官公到部清約自束  
凜凜奉職豪賚不敢干訟滑爲之屏息解帑金入京  
師秋毫無所染委治河躬自督率視水道疏濬不半  
載河工成州財賦可數十萬公庭寂鞭撻聲如法輪  
入三月無逋賦公廉惠得民如此上官逢所署缺輒  
以公往吳中長者擬公吳隱之之酌水西門豹之治  
渠不虛也時給諫劉公某謫崑山丞署州事劉故相  
國王公門人乃往候王問州利病狀王公曰若知州  
別駕張君乎曰固知張君冢宰第也王公愕然曰非

也知州利病莫如州別駕稔也于是劉公交歡公每  
事必以咨州民賴焉公既約已奉職勞苦過常帶爲  
之減亾何構危病不起州守張公過視病瀟然無辦  
流涕顧僮僕曰無以殮也對曰主人有言吾生不累  
吾民而歿累吾民已令人持素所飲銀卮入金閭易  
木矣守大嘆服揮淚去會天幸無恙公拊心嘆曰吾  
幾不見吾父父在也又無子乃勞勞官下耶遂壹意  
投檄去撫按諸部使者惜畱之不得同聲獎其恬退  
聽致仕歸州士大夫爲賦考槃之章焉公既歸娛事

吳山公則閉戶危坐讀書檢藥草臨法書瓶花杯酒吟詠以適無外羨刺史方公楊季公東魯暨督學諸使者後先以鄉飲酒禮敦促可二十餘次公俱堅不赴曰吾儕小人賤賤責丘園已幸而以干大禮侵賢者坐哉識者益高之公天性孝友從太倉州歸養凡再易寒暑而吳山公始捐館公哀戚讀喪禮幾毀與澄洲公自髻鬣至白首歡愛如一日明洲公內構讒微失歡及明洲公夫婦相繼歿家盡廢諸子不知所往公臨治二喪身荷鍤爲墓葬之恭懿公每舉以示

寓林集

卷之十五

二十三

闔宗曰如衡洲第者至行可師也時恭懿公以耆年解綬歸與公日尋泉石琴酒之樂情好彌篤烟水之間婆娑二白人望之如仙會張公振之以太倉州人來刺杭郡縉紳數十百人往謁賀張公獨西向揖問吾父母張衡洲先生何在客咸目攝公張公斂容曰衡洲先生吾州二百年以來廉吏也世以此益知公清白之標出處一致焉公晚年舉子懋官辛卯予過視懋官於家塾舉易發難酬望如響予以長女字之自是數與公往還見公敦睦在宗和易在里風雅

在山水琴藥，一一如夙昔所聞。所居必掃除淨潔，似郭有道宿處。終歲無雜賓，至几塵不飛。恭謹有加，儼萬石家風。神情恬介，謂公可百年而不謂公竟倏然逝也。公無大病，狀寢不甦。枕席歿前一日，尚起見客。神氣爽爽，生平不佞佛而於身心間若有透脫無恐怖散亂。十年前製木一歲，前爲三子立分券。一月前，制衣半月前，畫遺像，猶出以眎余，欣欣相向。臨歿，忽起正襟坐，以足授履，諸子且將掖而行，執案嗒焉喪矣。視履考終，公非善出處，善生效啓，手足無憾者哉。元

配李孺人爲玉岑李公女，莊凝嫺內，則公孝事親，則孺人承其意，孟康七肉必手調，以進。公友兄弟，則孺人柔和其妯娌，惠碩無倦。公旣廉於入，又不屑屑家人。人生產則孺人手筦之，巨細無漏，而周大體無婦人纖嗇態。公爲州倅，有萼鱸之思，則曰：吾不難爲隱妻也。公幾艾憂，無子，孺人則不難爲公寘。賸貳曰：蔣曰：王舉子三人，蔣舉懋官，王嗣舉懋宗，懋寵孺人，念懋官細弱，則挾以同臥，起氣息相屬。懋官得危疾，孺人政病乳癰，猶帶病持懋官轉側，而不知癰已潰流血。

淡頸矣所以撫二弟亦皆如懋官後三年竟以癩遺  
歿至已所生女則絕不以橐籥見私臨歿盡出所藏  
予諸兒而手持姑某孺人所遺釵鈿類以授公曰欲  
以遺吾媳亦吾家球琬也其慈而重本如此恭懿公  
夫人集諸世婦及姻戚魚軒如鱗宗祊中外有禮儀  
必曰李孺人來座爲之整蓋不減鍾王閭範則豈惟  
樛木小星有逮下之德已哉然則張公所以退而棲  
巖進而牧守恬介以老至歿而不亂豈獨公能也懋  
官又言公當四十時一時名流各有投贈青門山人  
寓林集

卷之十五

二十五

繪一仙人種三芝圖爲壽自題云時七十七歲曰此  
吾所爲祝也公每珍玩嘆息今年忽舉眼見所題畫  
日期至矣予殆將往矣越旬日果然嗟乎非公心行  
無疵乘理達命其能符應若斯乎公它施德活人事  
不具論論其大者公生嘉靖甲午三月五日卒萬曆  
庚戌九月二十日得年七十有七李孺人生嘉靖

四月四日歿萬曆甲午四月十四日得年六十有

二女四長適郁名世某邑諸生孺人出次適柴應槐

太學生次適楊廷憲某邑諸生某出懋官旣負雋有

聲庠序而二第亦皆以少年能文章將益大公之門  
以無怠恭懿之業于是乎在懋官等以今年十一月  
二十有一日遵治命扶公柩暨孺人啓龍井山之  
藏而合窆焉因誌其畧而系以銘

銘曰張氏之族蟬聯鵠舉甲第衣冠聿生我公恂恂  
長者文脩行端進爲廉吏退若處士巖居川觀宜爾  
孺人雞鳴燕翼齊孟匹桓南山之陽興龍濼泉佳氣  
鬱盤我銘其幽蘭滋玉潤奕世無刊

吳母畢孺人墓誌銘

寓林集

卷之十五

二十六

吾友仲虛太學吳君歿廿有一年而元配畢孺人下  
從之又三年而仲子芝且卜葬焉乃乞狀于葛憲副  
水鑑而以墓中之石請曰惟吾子之夙好先君也則  
稔知母孺人賢夫浮于賢而乞臾于吾子芝也不敢  
賢矣而令泯泯泉下無以昭來世詎惟芝弗忍吾子  
其忍之予于是謹受爲誌按狀孺人畢姓出閔川名  
族父曰畢一山公母曰汪孺人生有令德十八歸仲  
虛舅龍泉公姑黃孺人性束濕難孺人起居堂上  
夔夔惟謹迨龍泉公夫婦相繼歿孺人從仲虛哭之

哀時長公伯實秉家政仲虛敦友于惟兄之共孺人亦惟仲虛之共而仲虛雅秀負文采攻舉子業及嗜古左史兩漢百家之書又多先生長者游孺人治漿酒脯炙之具佐其歡亾弗給者而閫以內事孺人身理之髮櫛繩理井如也以是仲虛無分志得精研耽文稱爾雅云初孺人舉一女未笄而殤仲虛未有子孺人請廣置貳于武林曰仇曰蔣曰孫頃之蔣舉伯子懷真孺人歡然喜溢于睫曰蔣之子吾子也已孫又舉仲子懷上孺人則又驩然喜曰孫之子吾子也

寓林集

卷之十五

二十七

維二子亦依依慕之如其所自出也孺人與仲虛對眉案時時以有子爲樂然仲虛向以哭兩尊人病嘔血繼哭兄伯實而獨持戶營諸務又手不廢書益勞苦已亥病復作一切醫藥祈禱賓從車馬之煩孺人身肩之而仲虛攝它靜室不能數詣問則日夕拊膺泣時兩兒在武林仲僅六齡伯年十三稍長趣之歸時僅一日而仲虛不起孺人相向悲泣不已幾以身殉復念兒弱未立過傷哭泣則益傷地下心乃收淚撫之所珍惜倍曩時第遣就外傳勿令逸及伯長而

娶婦連舉子而孺人喜可知也逮仲亦歸娶婦拜孺人堂上已又舉子孺人顧兩兒玉立諸孫森森繞膝前含飴弄之則益喜溢于睫而黯然傷夫君之不及見也惟諄諄強學勵行無墮先志是訓壬子夏伯子以精心過耗俄而得嘔血病孺人日夕飲泣醫禱如仲虛病時越歲竟不起孺人拊膺呼曰天乎吾往以哭吾夫亾以屬兒而兒又亾乎悲泣殊不已或謂無庸仲與諸孫在也于是豁哀強起視事而仲子卽少年當戶英英特立無流俗人習事無纖鉅入稟命孺

人孺人性明決以理衷之斬斬如也孺人卽所居素封獨尊尚古質不爲華言飾行無珍麗穠郁之好穆然內處言不出閤旦起肅見諸子婦如嚴君媪尼輩謝勿通諸子婦凜凜則之嗟乎若孺人者可謂順而貞慈而有範庶幾古之賢媛者已生平少疾病戊午秋忽遭寒疾以九月六之日倏然逝矣悲哉距其生嘉靖癸丑四月十二日得年六十有六子二懷真懷上俱太學生懷上今改名芝孫男九人維城維寧維屏維屏更名賁邑庠生維翰維垣懷真出維鑄維錡

維祺維藩懷上出孫女七人曾孫女一人某年某月  
某日芝帥維城等葬孺人某山之陽是宜誌而系以  
銘

銘曰爾夫也良含章履道而爾是宜爾之宜之以婦  
則順以母則慈厥子暨孫森森其枝曰惟爾貽比于  
風人載詠小星載歌螽斯後百千祀徵吳令儀爰視  
此辭

有法度  
恭靖孺人權厝誌

孺人姓孫氏諱孟芝錢塘人予友錢長人之妻年四  
寓林集

卷之十五

二十九

十有七以萬曆四十年十月初四日卒以其年月日  
權厝鳳皇山之亭而長人來請銘予時未暇長人書  
六七至未嘗不以銘爲言且曰夫人有足傳者不傳  
有不必傳者傳吾婦非不必傳者也吾婦未嬪而哭  
其姑慟旣嫁而養其母虔事我太宜人而箴管線纒  
之無闕兩佐我襄大事而飯含帷幕鬢笄之必信以  
誠內外宗黨下及胤僕莫不宜吾婦者此歿而思慕  
之不已相與私謚爲恭靖者也爲吾家婦三十年而  
未嘗有私蓄盡粥其嫁時繫袞益市田廬以贄吾賓

祭。又時縮其功以資我辟雍之游。吾婦性勤而才敏。當先君時。食客千指。不問而酒漿時具。及吾之身。日趨于窘。而補紉饋饗。又一任其勞。使我忘屢空之憂。以肆力于文章。吾婦力也。吾自幼惰于學。自獲吾婦。而始知詩書之樂。蓋吾婦喜讀書。觀史尤嗜。毛氏詩。悉授諸女。閨中舉詩句。行酒爲笑。六歲學女紅。女紅絕。八歲學琴。琴絕。十歲學水墨畫。能画遊魚小蘭。晚而學詩。詩多見道語。吾婦吾之師友也。吾四困公車。乞爲學官。而解宇囂迫。又時絕廩餼。吾婦煎糜笑啜。

寓林集

卷之十五

三十

曰。此首宿家風。君無不自得。予窮于世久矣。出與二三子遊而樂。入見吾婦之安貧而益晏。如以適也。吾年漸邁。而無嗣續。吾婦爲買妾者三。愛之如女。吾嘗病。吾婦率鼓琴焚香以調吾性。或朗讀古人奇文。以豁吾志。臥聽之。而不覺其霍然。已決然起也。吾婦四哭。殤鬱鬱不自樂。吾故挈之遊陽羨。棲水間。又嘗渡江絕淮。直走燕趙。扶攜數千里之外。及不幸以歿。則一夕之間。五十里之近。而不克執手以訣。吾之所以悲吟永嘆。勤勤懇懇。而必欲其傳也。予聞而傷之。孺

此即承  
志梅  
命身也  
不覺其  
滄海已  
見滄海

人以女子之微明人倫知道理安貧好書宜家惠下  
無險誠傷善之心此士大夫之所深媿而不為頌述  
以傳無窮真我輩責矣古之賢夫婦見于詩書交傲  
交愛者無如雞鳴勸其夫早起射戈而婦為加豆御  
琴瑟相與飲酒以期偕老又欲預儲珩璜琚瑀之佩  
以佐其夫之求友故孔子有取焉載之國家與大姒  
並今孺人之賢不讓雞鳴而世無孔子將賴小儒之  
文以俟百世此其所以尤可傷也予忍不銘孺人生  
三女四男男殤女皆知書與孺人錯舉詩句為笑者  
寓林集  
卷之十五  
三十一

也壻某皆名族銘曰

珮玉晏鳴關雎刺也咏古淑女以悼世也繫我孺人  
其儀一也汗澣綵綺幼所習也琴瑟靜好彤管煒也  
檀水清漪罔怨謫也小星三五惠及下也宜爾子孫  
比蜚螽也碩人頤頤何子子也我為斯銘中心結也  
子嫻國風聊用唁也

吏部稽勳司員外郎德園虞公墓誌銘

吾友司勳虞公長孺諱淳熙以萬曆癸巳去官歸錢  
塘偕弟僧孺隱南山回峰下已遷李茆之飛僊里採

尊行樂嘯詠。惟適棲寂。課玄六時。不輟。足迹不窺宦府。雖臺府大吏及四方之客。遊武林者。懷刺造廬。欲一識其面。亦戒門以絕。天下知與不知。語及虞。司勳輒曰。異人異人。云。如是者三十年。天啓元年六月。坐而沒。沒後。頭顱如蕪。支無辟戾。或謂尸解去。三年三月某日。公子宗政宗瑤。如公命。葬西溪七十二賢人峰下。公生于嘉靖癸丑。父封職方賓門公諱舜卿。母贈安人黃氏。安人婉而失乳。目光回回。十二時皆不瞑。識者已占其異。釋晬盤。所弄惟書帙。三歲黃安人

寓林集

卷之十五

三十二

抽簪染口脂。爲授句人耳。便誦十五出試。試經書論策。五道立就。主司驚不信。掩卷令誦。公不屑。岸然去。十七復出試。學使者潮陽林公行部奇公。補郡諸生。曰。虞生天下才。蓋令王元美李于鱗見之。于是移書介公往謁。兩先生倒屣迎。相推許如林。名振江左。又十年。已卯舉省試。第四人。同榜多才名士。而公爲冠。當是時。當途諸公亦爭相引重。而公嶽嶽高子羽之節。毫不干以私。公故名人。期已上公車。赴同鄉達官。飲。坐有江陵客。侈談相君威。公不覺髮上指。矢口曰。

使某得通藉者袖中彈文不敢避容慚愬江陵江陵不悅于是聞中識相君意擯弗錄而言官至上疏言浙有三變兵變民變與文變而三蓋指公也公既絀于北乃遊南雍祭酒復榜所試文于橋門曰怪誕不經公嘆曰吾文不誕而所如輒誕吾文如一口何哉吾足不堪再刖于是更名首燕路則江陵亦坳遂成進士時萬曆癸未也明年將除官而賓門公計至公哭欲疾奔而歸茹蔬啜粥廬居者三年服闋授兵部職方司主事時朝鮮絀兵朔方畔人戕大帥軍書狎

至公爲大司馬石公條八議預刻火落赤畔日及關白歿期無纖髮爽石顧不能用曾侍郎第某議減軍儲軍大譁飛石擊侍郎中首侍郎奔省中匿則相與逼近朝門而詬石司馬大聲言仍額給不減譁甚莫聞也公急取虎牌大書不減軍糧四字以麾遂散去嘗護作昭陵會昌平戒弛虜千騎直逼紅門駐馬吹唇若沸相顧問珠襦玉匣守將愕眙罔措公徐率緹騎結方陣半隱林中鳴鉦駭之虜遂遜公神識先定臨事消弭而不言功多類此亾何遷主客員外郎

踰月改司勳。又踰月引疾歸。明年當大計京朝官。而吏部尚書孫清簡公鑑考功。郎今左都御史趙公南星。以盡逐政府私人賈怨。言官阿政府意。欲中尚書無郤。而公所補司勳呂某缺。呂清簡公甥。有流言。遂借呂摺拾公。謗公行賂。以觀尚書考功之俯仰。尚書果大詫。疏言淳熙恬澹味道。老臣素重其品。且貧安所得金。言者妄。淳熙不當罷。旨下。畱用。言官亦內自悔。而一給事獨爭之力。詆銓部專權擅畱不敬。上以爲然。誚尚書尚書屹不爲動。執奏如初。于是

寓林集

卷之十五

三十四

上大怒。奪尚書俸。降趙公三級。免公官。而僉都御史王公汝訓。右通政魏公允貞。大理曾公乾亨。及諸曹郎陳泰來。顧允成。輩十餘人。各抗疏。白畱淳熙非私。且歸咎政府。上益怒。諸曹郎降謫有差。公與趙公俱削籍。而尚書亦十疏乞休矣。迄今三十年。公論大明。天子深念先朝骨鯁。魁壘著艾之臣。起趙公田間。遂長御史。列于三公。而公之精氣已與造物者遊。嗚呼。遇不遇。不足爲公悼。而悠悠之論。至謗公以金錢得官。此許由見疑于逆旅。而鴛雛受嚇于鷓鴣也。

悲夫。公至性天植。母病坐臥牀下。抱上下危樓。凡兩匝月。歿而作孺子啼不已。事賓門公雖貧。必極驩。其居廬也。叱虎虎去。呼獐兔獐兔來就食。人謂孝通神明云。公既不得志于時。而宏護淨業。所在經筵法席。以身爲導。又愛惜名勝。卽兩峰六橋三潭間。松石花鳥蟲魚之屬。咸以公爲天。公故貧。孺子力不能購書。獲有奇秘。與弟閉門抄寫。掃葉煮茶。窮晝夜不盡不止。以故涵育浸灌。汪洋奧衍。有武庫行秘書之目。詩文宏深微眇。應念而作。風生雨集。排古蕩今。作者人

人自廢。公尤嗜道術。自少喜談神通。謂人生貴悟道。不則斑馬淵雲第。藝語蕭曹衛霍。向弇中行耳。嘗登天目坐斷崖。活埋庵處十餘日。豁然有省。嗣後神明四闢。事來輒先覺。謂弟曰。吾欲爲陸法和。弟僧孺亦曰。吾兄一生多仙靈奇異之感。其所由來。要不可解。予讀其所爲公傳。恍忽登閬風。從化人焉。予識黯淺。不足測公百一迹。其所至。大氏以儒爲行。以玄爲功。以禪爲歸。以山水爲寄託。以詞翰爲遊戲。以闡述爲經綸。古之所謂得道畸人。是耶非耶。公童子時夢遊

武夷引桃杖擊空。見龍沈雀鳴。吟曰龍沈海底日。鶴  
鳴松下風。嗚呼公出而屯雲雨之澤。處而遊塵壒之  
表。神先告之矣。其奪司勳而老也。特借讒人以自踐  
其夢。人乎何尤哉。公居恒訥訥。見人輒面發赤。而臨  
事氣決勇于貴。前知如神。而天目取悟。以後復埋  
照不露。流俗人寡接。而所過從道侶。若雲棲師。仰古  
庵先生。及朱大復。陶周望。湯若士。袁石公。吾輩二三  
知己。周旋竟日。忘倦。公脩軀瑩膚。渥顏飄髯。每曳杖  
嘯長松下。不知者殆真以爲仙人也。公每多異夢。因

自號六夢居士。又號瞻子烟客。學者則稱德園先生。  
云所著詩文六十卷。陰符演一卷。標丘子二卷。孝經  
邇言一卷。孝經集靈一卷。大學繁露一卷。行于世。而  
孝經邇言集靈則張給諫某以爲千秋絕學。奏布學  
宮。旨下部。楊司成起元爲鐫小帙頒焉。公先世陳  
畱人。三徙入由拳。有祖貞者。贅錢塘之黃氏。謬籍其  
軍。以逮曾祖奎祖翊。是生賓門公舜卿。贈兵部職方  
司主事。自公爲職方。削牘上大司馬。具白所以謬籍  
黃氏軍狀。獲除第僧孺。名淳貞。與公偕隱者也。娶楊

繼室李俱贈安人側室何孺人先公二年卒公年六十有九丈夫子七人有者二宗政府學生娶鴻臚寺署丞裘樹堂公女宗瑤府學生娶憲副莫荆泉公女秀異有父風何出餘俱殤女四幽芳適昆明刺史錢養淳公子萬福清芳適余倩張德懋子岐然閒芳適李桂亭子承宗皆士人素芳殤孫男一孫女三瑤出余爲之志而系以銘

銘曰宇宙靈氣虛空含億變惟一一涵三曰儒釋僊旨同叅彼迷不悟離岐談於惟虞公妙心湛師孔友  
寓林集 卷之十五 三七  
老販瞿曇逍遙野服辭朝簪著書明道藏秘函鶴鳴松風龍沈潭七十二賢停雲驂千秋委蛻樂且耽不羸其躬誕奇男我銘其墓文無慚

太學吳仲子喬年墓志銘

太學吳仲子喬年沒之二年其兄長孺悲弟之泯焉  
亾稱乃手述其志行乞予銘諸墓仲子予門人也固知其有可稱者卽微長孺言惡忍泯之仲子名昌齡喬年其字也吳之先自唐御史少微公以來不具述十三傳而爲大父省吾公繼美配程孺人省吾公有

子六人長懷德字寧甫次懷慎字吉甫則仲子父也  
寧甫君夫婦與吉甫君俱蚤世而寧甫無子吉甫有  
二子爲長孺祚與仲齡於是省吾公以仲子爲伯也  
後甫幼穉成服嶄然如成人游於塾日露其穎省吾  
公喜曰此書種也祚則治生齡則治經以其外大父  
程春秋起家遂授以春秋仲子能刻厲於硯文顧其  
體脩長而實厄羸手腕病戰每捉筆卽搖搖不自持  
以此稍見詘而志不受挫絕不問生產事擁羣書覽  
誦不輟時子棲息玉岑山抱支相質殊有英粲弘博

之氣不似其羸弱就試仁和令喬公君求首拔之道  
試卒以病腕拙書罷乃怏怏挾策入南雍乙卯之役  
期得一當臨試疽忽發于臂余適官南水部力止之  
不聽曰母老矣裏痛入竟不得終事仰天嘆曰嗟乎  
筆無神耶腕有鬼耶而厄我至此仍挾策歸刻厲如  
故亦不少挫其志惟念無以報母於母誕日誓願終  
其身齋素復遍謁名山若九子太和普陀大士崎嶇  
風濤之不避爲母延筭念所後父母若大父若父歲  
時展祭涕淫淫下事諸父甚謹事兄長孺驩愛一體

家政聽之無纖微間於諸舅父外父母無所不用厚於朋友若王宣佩者生而館餐歿爲之經紀其喪瞻其孤益孝友篤人倫其天性也至周貧振急掩骼放生津梁楚剝鑄經飯僧之事有願必赴不可縲指人謂仲子爲善若此勵志若彼享永生被榮名何疑而天奈何終厄之戊午應南都試復誦而歸又善病則時時召客高會行杯揮塵以散其磊塊尋病加羸漸至不起矣嗟乎豈非命哉病中自忘其病尚以季父病族人貧病者與婦翁戴旅襯爲念易簣時無迷亂

第二云吾心空湛圓明但本人欲去耳又屈指吾至某刻當行吳長卿師且至矣已而果然至期正襟向家人言吾行矣昔者王父憂吾疋而吾以疋人有子女九人矣惟是吾爲子而不得終養母也吾爲吾父後而未得安窀穸也兄在遠而不得相訣別也語訖遂瞑嗚呼痛哉夫世之文上徽幸一遇食肉富貴以至乎老者亦多矣而仲子名不伸志壽不盡年知交爲之流涕然自少而長行依孝友自病而死性存湛明刻期知歸啟手告盡大似學問修持之人視夫壯而

行敗老而智昏悠悠忽忽以稿首丘壑者寧同日語乎哉可以誌矣仲子生萬曆丙戌年十一月十一日歿泰昌庚申年十二月初九日得年僅三十有五配隆阜戴公存文女子男四聞喜聞樂聞韶聞知女五字某某今某年月日將舉仲子殯于栗木充之陽予既誌之而系以銘

銘曰謂爾名無成而爾於文有聞而行有稱何羨乎科名謂爾壽不長而爾生靡疚而死有後何減於老壽爾名不湮有誌以傳是爲大年樂哉斯丘佳氣鬱然曰吳仲子之阡

寓林集

卷之十五

四十

明兵部左侍郎經畧桐岡宋公配顧淑人墓誌

銘

左司馬經畧桐岡宋公歿五年而元配顧淑人歿歿又十二年所而長公子守一與季公子守敬手撫母懿行過不佞亨泣而請曰傷哉母夫人之未及志以葬也以先經畧公之尚在淺土也先經畧公有大勲于國例得予祭葬而會有扞之者未遂請也母夫人臨歿而呼不孝輩曰爾父功不白吾目不瞑毋

先及我遂巡久之顧念先經畧之功紀在司勳終必  
不泯母夫人懿行在閨闈之內及今不圖所以誌者  
將泯泯矣敢以累吾子某謝不文而于長公兄弟誼  
至篤向業已狀經畧公而何忍於淑人謹受而志之  
淑人顧姓父曰武畧將軍柳塘公母沈宐人未生時  
有青烏家過顧氏墓者指曰是當出貴女亡何淑人  
生生有奇表稍長靜婉授孝經內則諸書輒能解柳  
塘公喜曰是女所爲貴徵者乎吾不予凡兒而以贈  
左司馬虎山公與最善因見經畧公亦有奇表語所

寓林集

卷之十五

四十一

知曰此兒足當吾女虎山公請委禽焉越明年姑何  
太夫人病劇甚念得一見賢新婦而瞑淑人乃歸年  
十八作止凜凜無愆儀太夫人見而喜曰兒有婦矣  
遂瞑隨執太夫人喪朝夕哭甚哀而從中經紀其事  
如禮虎山公故豪爽不問家人產經畧公束脯之入  
不贍而爲文日有聲所過從皆名士淑人拮据女紅  
治甘脆承舅歡佐經畧公讀而餘以給客醕不足則  
脫簪珥幾盡無愠色也時奴氏秉家政淑人嚴事之  
如姑奴亦愛之無幾微間甲子經畧公舉于鄉兄梧

岡公爲郡公曹坐侵繫於理公願捐坊金贖伯氏而  
虎山公顧難之曰而不念而婦脫簪珥盡乎淑人聞  
之起對曰金與兄孰重伯氏竟以是得出而親黨嘖  
嘖稱經畧公友于歸賢淑人云乙丑經畧公成進士  
念虎山公請假歸踰年應謁選人復不忍離奉而北  
忽悟岡公卒于家虎山公不勝西河之慟至隕明服  
食起居微人扶掖之必躡而淑人相周旋益謹虎山  
公喜而語人曰俾予老人旣盲而視者吾媳也經畧  
公謁選得山西絳州守鞅掌刺州事無遑問室人而

寓林集

卷之十五

四十二

淑人慈飭門以內清澄如水以是政成晉秋官郎行  
壬申經畧公改戶科給事中尋轉禮而虎山公忽逝  
公哀毀不勝喪淑人朝夕從之哭如哭姑而佐一切  
含穉酬應亦如禮不以戚妨易服闋經畧公謁補仍  
禮垣淑人以覃恩封孺人制詞比于羔羊采蘋之  
詠殆無媿焉未幾經畧奉命視京營所條上邊事  
與柄相左遂出守濟南郡經畧意慨然拂衣淑人慰  
解之曰君薄濟南耶聞之海內政平訟理無歎息愁  
恨之聲者惟良二千石也公於是夷然就道抵濟南

厲意郡事。濟南大治。而淑人恣飭門以内。如居絳州。時公奏最爲天下第一。淑人晉封恭人。俄而經畧公。晉山西按察司副使。嗣歷河南叅政。山東按察使。遷江西右布政使。轉福建左布政。所至著績。而淑人暫憇於家。逮拜開府三齊之命。仍偕行。經畧公風厲文武吏。撫循百姓。牧豎嬉於野。士卒肅於伍。東人安。利者累年。歲淑人笑以語公曰。君往者薄濟南。而乃今見休盡東土也。壬辰。召公入爲大理。公語淑人。

曰。吾一介貧士。躋位九列。不負而翁。水鑑願足矣。其

寓林集

卷之十五

四十三

偕鹿門隱乎。淑人額之。方草乞身疏。而會倭陷朝鮮。京師戒嚴。中外震動。廷議經畧難其人。朝臣左顧。右盼無敢前者。共相推轂。公敦趨百端。公奮然曰。事不避難。臣之職也。遂叱馭行。由廷尉三遷爲少司馬。神廟獨倚注公。授鉞東征。語具經畧狀中。淑人卽以是冬。季月還抵家。朝夕焚香祝禱曰。婦人不能執干戈以衛社稷。仗佛之慈。願夫君功成報主耳。癸

巳。破平壤。露布聞。而淑人喜可知也。甲午。經畧公振旅還朝。議且虛中樞席以待。而會與當事者論左。

亟欲賦遂初。淑人亦遣次公之京。語公曰：功成名遂，身退其時也。願無忘壬辰之志。公遂拂衣歸。絕口不譚東事。日與二三門人故舊嘯咏講論，不輟。淑人庀酒漿鮮肥之供，不告囂恥。而公宴然林泉之適。若物外人也。時率長公從雲棲師法席，證無生之旨。作流水長者，因而淑人齋居事佛，亦時時歡喜助之。人稱淑人非惟貴匹，亦道侶也。是歲經畧公以三品考滿，贈三代如制母，是以封淑人。歲餘，神廟念經畧公

勞苦功高，晉都察院右都御史與世廕。壬寅，長公以

寓林集

卷之十五

四十四

謁選入都。長公生無媚骨，居歲餘垂橐，無能行媚。卽故交在事者，秦越視之。竟寢不行。淑人以手書招之，曰：盍歸乎！來命也。姑俟之。長公趣歸。越三年而經畧公辭世。淑人哭之哀。長公以訃聞。神廟下其疏。吏禮二部議，所以恤勞臣。司勳朱公某條議如例。幾得請，而會有故爲公撫東時屬吏脩郤者，忽從它曹郎出，糾叅疏至。再長公亦疏辯者三，三得旨報可。而叅疏畱中不下。然事亦竟寢。長公時對人揮涕言先經畧手奪六千里殘破之屬國歸之。朝廷以視今

之遼山遼水覆軍殺將殘兵耗餉而不可收功罪如  
何哉而孤獨不能白父功承主恩稱人乎遂絕意  
仕進與次公奉淑人膝下茹蔬甘于鼎食衣布榮于  
錦綺淑人顧而樂之亦融融如也而奈何其奄然逝  
耶臨歿無它語惓惓以白經畧功爲囑已而起坐盥  
手喃喃稱西方號而瞑嗟乎淑人之所種者深矣蓋  
淑人生平孝慈豈惟事姑若舅生死盡志其母沈疴  
人病而湯藥効而喪葬身任之期無憾親屬若女兄  
弟若兄若兄之子若孫眷焉矜恤推而之里嫗以迨

臧獲勿忍遺也生平儉素諸子孫婦不敢以華腴見  
至施予作善事老而彌篤饑者食寒者衣病者藥僵  
者棺無虛月冬之湯夏之水無虛歲而飯僧以千計  
治津梁道路以十百計活魚鳥以百萬計不可勝紀  
也趾不踰戶而明達曉事人莫能欺佐經畧公馭歷  
中外三十餘年內政井井而出處大事公每與折衷  
尤婦人所難矣長公又稱淑人精誠通天人之應當  
長公在襁中偶爲被所蒙咽不能出聲幾殆淑人方  
理絃忽聞空中有語以兒急者趣視之乃解乙丑經

畧公上公車得寒疾幾不得入闈淑人聞之爲日夜  
哀禱而經畧公於病中恍見天神有捉刀斬魔者驚  
悸汗下病遂已居京師嘗念其母南向涕淚卜之神  
得筮有直待錦衣公子至語初不解所謂已而淑人  
以虎山公喪歸踰年值母病歿得竭力大事語始驗  
其精應往往如是故淑人信心脩持皈依淨業垂五  
十年一日也然則淑人自女而婦而母而王母淳儻  
聖善非它尋常閨闈之秀可比倫者以經畧公之勲  
勒諸旂常而有淑人之賢載之彤管耦德媿美昭垂  
寓林集 卷之十五 四十六

百世不亦宜乎淑人生於嘉靖丁酉六月三十日歿  
於萬曆辛亥七月初四日得年七十有五長公其將  
以某年月日祔經畧公葬于某山之陽 國有常典  
褒恤勞臣以及淑人幾幾望焉子孫婚嫁不具詳詳  
在經畧公志爰系以銘

銘曰惟臣從王內安外攘勲名孔揚惟婦從夫爾恭  
爾淑相得而章生慧以莊長壽且康逝也吉祥 帝  
念勞臣或薦之俎載錫之壤一德合體于焉偕饗于  
焉偕藏坤厚無疆慶延世世子孫其昌

